

## Jeremia 26 - Jerusalem sal soos Silo verwoes word



Hoofstuk 26 se gebeure vind 'n kort tyd vóór dié van hoofstuk 25 plaas, kort na Jozakim koning geword het. Die toon van die boodskap van die Here aan die volk in die gedeelte is dus minder skerp as dié van hoofstuk 25 en die aanbod meer vrygewig: ?Miskien sal hulle luister en hulle van hulle verkeerde lewe bekeer. Dan sal Ek die straf herroep wat Ek oor hulle wou bring oor hulle sondige dade.? Die oordeelsboodschap is egter steeds onmiskenbaar.

Hoofstuk 26 bevat in wese dieselfde opdrag waarvan ons ook in hoofstuk 7 lees, dat die Here vir Jeremia beveel om in die tempel te gaan staan en aan te kondig dat die ballingskap amper onafwendbaar aan die kom is. Waar die verhaal van hoofstuk 7 egter uitmond in 'n fokus op die interaksie tussen die Here en Jeremia, brei die verhaal in hoofstuk 26 uit op die interaksie tussen Jeremia en die volk wat amper sy dood beteken.

Die hoofstuk kan basies in twee gedeeltes word:

- 26:1-6 - Die aankondiging van die verwoesting van die tempel as hulle nie tot bekering kom nie
- 26:7-24 - Die interaksie tussen Jeremia en die volk

### **26:1-6 - Die aankondiging van die verwoesting van die tempel as hulle nie tot bekering kom nie**

Soos vroeër by hoofstuk 7 gesê, kan dit wees dat Jeremia sy beurt as priester gebruik het om in die poort van die huis van die Here te gaan staan om dié opdrag van die Here uit te voer.

Jeremia gee hier minder detail oor die sondes van die volk en maak eerder net globaal gesproke die punt dat die volk na God en na sy profete moet luister. As hulle luister, sal die Here die straf afwend. As hulle nie luister nie, sal die Here hulle vernietig soos Hy vroeër gewys het met die verwoesting van Silo, so 50 km noord van Jerusalem, die plek waar die tabernakel met die ark eers geplaas is voor die tempel in Jerusalem gebou is.

Weens die ongehoorsaamheid van die volk is die ark toentertyd weggevoer in 'n ballingskap? en die tabernakel verwoes in die [tyd van Eli](#) en die dorpie self verwoes in 722 v.C. met die noordryk se ballingskap. Psalm 78:59-64 (lees meer: [Psalm 78 ? Die raaisel van onbestendigheid](#)) verwys ook na die feit dat die Here die volk die onderspit laat delf het in die oorlog by Silo en die ark weggevoer is. Soos Silo vroeër verwoes is, sal dit ook nou Jerusalem se lot wees, indien die volk hulle nie tot die Here bekeer nie.

## **26:7-24 - Die interaksie tussen Jeremia en die volk**

Daar is hier nog by Jeremia en die Here 'n element van hoop dat die volk sal luister (hoewel dit met tyd tevergeefs blyk te wees). Dié boodskap word egter nie goed ontvang deur die amptenare, priesters en profete nie en hulle wou hom daarvoor doodmaak. Hulle kan nie aanvaar dat hy só iets kan sê nie, want hulle werk met die verwagting dat God se verbintenis aan Jerusalem hulle skotvry van enige gevolge van ongehoorsaamheid sal laat afkom.

Die mense drom na dié toespraak nie net om Jeremia saam nie, maar die paleis amptenare het ook hulle opwagting gemaak en terstond besluit dat Jeremia die doodvonnis moet kry, omdat hy 'n lasterlike? dinge teen die stad sê.

Op sy verweer dat sy dood hulle eie verwoesting sal verhaas, en dat daar boonop uitkoms vir hulle is, as hulle hul verkeerde weë laat staan, het hulle egter vir eers vir Jeremia met rus gelaat, al het hy ook verklaar dat hy bereid is om te sterf vir sy boodskap. Sy vurige pleidooi, nie soseer vir sy eie lewe nie, maar vir wat die vergieting van onskuldige bloed aan hulle lewens kan doen, laat hulle afsien van hulle bose planne.

Van die leiers van die land - die oudstes - kry toe die moed om die herinnering van die volk te verfris met die verhaal van die verhouding tussen profeet en koning in die tyd van die profeet Miga (Miga 1:1 - Moreset is so 40 km suid-wes van Jerusalem), tydgenoot van Jesaja, en koning Hiskia. Hulle haal 'n gedeelte uit sy profesieë aan (Mig. 3:12) as verduideliking. En hulle herinner almal daaraan dat in plaas van om die boodskapper dood te maak, Hiskia die boodskap van Miga geglo en tot bekering gekom het (2 Kon. 19, hoewel Miga nie daar genoem word nie). Dit is die regte manier op 'n profeet se boodskap te reageer.

Jojakim was egter nie tevrede nie met sy amptenare se reaksie en dié van die ander leiers nie, maar los op geslepe wyse eers vir Jeremia uit, omdat die priester Agikam, een van Jojakim se pa, Josia, se raadgewers, aan Jeremia se kant was. Jojakim wreek hom dus op 'n ander profeet, Urija, wat dieselfde dinge as Jeremia gesê het en laat Urija doodmaak.

## **Boodskap**

Dit bly 'n uitdaging om die waarheid aan dié in gesagsposisies te bring. Dit bring altyd konflik. Soms kan die wyses van die land tot redding kom deur die regte goed te onthou en ander daaraan te herinner. Dit red Jeremia in dié geval van die dood. Soms kry die magtiges egter skuiwergate of gebruik slinkse maniere om die boodskapper en sy boodskap te probeer uitwis. Dit beteken Urija se ondergang in dié geval. Hoe tragies.

Maar die sukses van Jeremia en Urija se onderskeie bedienings lê nie in óf die een se lewe óf die ander se dood as gevolg van die reaksie op hulle bediening nie. Die sukses lê daarin dat die boodskap afgelewer is en sy werk sal doen, ongeag die uitkoms vir hulle persoonlik. Daarin lê groot troos en tegelykertyd 'n groot uitdaging.